

Ina unda da simpatia per La Quotidiana

Tschintg iniziants lantscheschan in appel per la gasetta dal di

CUN GIUSEP NAY HA DISCURRI
CLAUDIA CADRUVI / ANR

■ **Mintga Rumantsch e mintga Rumantscha sa a partir dad oz signar cun ses num en l'internet l'appel Pro Quotidiana. Pussaivel è quai grazia a tschintg prominents iniziants che sa mettan en ils stadals e vulan ch'il pievel possa mussar sia simpatia e ch'ins cuntinueschia cun la gasetta dal di.** L'idea deriva da l'anteriuur schurnalist dal Beobachter *Hans Caprez*. Da la partida èn era *Maria Cadruvi*, *Gion-Andri Cantieni* e *Bernard Cathomas*. Il tschintgavel è l'anteriuur derschader federal *Giusep Nay* che ha gist anc surpiglià la rolla dal pledader da medias.

La responsabladad principala è uss tar il chantun


Suenter 20 onns less la Samedia chalar d'edir la Quotidiana nun ch'i dettia ina sprezza finanziaria substanziala. Tge vul Voss appel?

Giusep Nay: Hans Caprez ha gi l'idea ch'ins sto uss mussar ch'ils Rumantschs vulan La Quotidiana. I dovro in appel – era per quellas persunas ch'èn londervi da preparar in concept co ch'i duai ir vivanant cun la gasetta.

Esì immediat stà cler en tge furma che Vus vulais far l'appel?

Nus avain ponderà quant concret che nus lessan formular la chaussa. Uss essan nus sa restrenschiids sin quatter appels. Sco emprim exprimim nus in engraziament e la solidaritad cun il schefredactor *Martin Cabalzar*. Sco segund apellain nus a la Samedia ch'ella portia responsabladad e tanschia maun per ina soluziun transitorica fin ch'ins chatta ina nova via a lunga vista.

Ha la relaschada da Martin Cabalzar dà il stausch per quest appel?



Ils Rumantschs duain appellar da far guttas cun chau per segirar la gasetta dal di, di Giusep Nay sco pledader dals iniziants. FOTO T. DEFILLA

Per mai persunalmain bain. Jau chatt ch'in tal segn da solidaritad è necessari per betg laschar el – cun tants merits suenter trent'onns lavur per la pressa rumantscha – tranter sutgas e bauns. Nus engraziain era al cussegl federal e schain che nus prendain el per il pled: En sia resposta sin l'interpellaziun da cusseglier naziunal *Martin Candinas* ha el exprimì sia prontadad da sa gidar sch'il chantun e la Lia rumantscha fan ses pensums. Quai munta terzo ch'il chantun e la Lia rumantscha ston uss vairamain prestar buna lavur e guardar da metter in bun concept sin via. E quarto duai la Rumantschia, ch'è la finala sezza responsabla per ina gasetta quotidiana, far quest appel.

Tge muntada ha l'existenza da La Quotidiana stampada?

Ina gasetta stampada è ozendi, malgrà tut las purschidas online, vinavant in

organ impurtant per la lingua. Jau hai gist gi sin telefon in pur da Surrein, en sasez pervi d'in'otra chaussa. El ha ditg: «Sche nus n'avain betg pli La Quotidiana na savain nus gnanc pli tge che la vischnanca fa e tge che marscha en autras vischnancas. Da quai na rapporta uschiglio nagin.» Qua vesan ins l'impurtanza da quest organ che publitgescha ultra da novitads regularmain contribuziuns pli approfondidas, litteratura e columnas rumantschas che mantegnan dal reminent er il stgazi da plects. Quai fa schizunt bain a quels che scrivon las columnas (el sto rir). Jau scriv bunamain 90 pertschient per tudestg, lura ès magari bun da puspè exercitar l'adiever dal rumantsch.

Vus scrivais sez columnas e brevs da lecturs. Senza La Quotidiana svaniss questa plattafurma che blers Rumantschs nizegian gugent per s'exprimer.

Gist quai è ina vart fitg interessanta da la gasetta. Jau legel regularmain las columnas e contribuziuns da lecturs. Là vegnan tractadas tematicas actualas da giuvnas rumantschas u dad umens pli passads. Uschia porscha la gasetta in maletg dal viver e dal pensar dals Rumantschs.

La gasetta porscha in maletg da noss viver e pensar

Tge lessas cuntanscher cun l'appel Pro Quotidiana?

Nus lain propi exprimer che la responsabladad principala è uss tar il chantun. Il cussegl federal ha empermess ses sus-

tegn e la Lia rumantscha vul sa chapescha era ina soluziun. Ma ils daners da la confederaziun dependan dal chantun. Lez sto era esser pront da contribuir sia part. Uschia è uss cunzunt la regenza grischuna dumandada da vairamain procurar che avunda meds stettian a disposiziun per ina gasetta quotidiana per Rumantschas e Rumantschs.

Igl è atgnamain da smirvegliar: Si da Berna è svelt vegnì in signal positiv da sustegn. Ma en l'agen chantun han ils Rumantschs savens difficultads da chattar udida.

Exact. Sch'ins sa co ch'il cussegl federal respunda uschiglio interpellaziuns, è quai (redacziun: la resposta sin l'interpellaziun Candinas) ina da las raras respostas che tunan uschè positiv.

Ins sto mussar ch'ils Rumantschs vulan La Quotidiana

Duess La Quotidiana cumparair vivanant en furma stampada?

En noss appel vesain nus sper la gasetta stampada era ina furma online. Nus n'essan betg illusiunists che crain che la gasetta stampada tradiziunala sappia adina vegnir mantegnida sco fin qua. I sto dar ina maschaida da la furma stampada ed online sco tut las autras.

Duess la gasetta cumparair mintga di?

Gea, e sch'ins fa ella era online, na cumpara ella betg mo tschintg dis, mabain vegn actualisada era la sonda e la dumengia. Ma nus na lessan betg entrar memia fitg en detagls, quai n'è betg nossa chaussa. L'intent da l'appel è vairamain ch'ils Rumantschs e las Rumantschas dettian in ferm signal ch'i stoppia vegnir fatg guttas cun chau.

Dapli sin www.proquotidiana.ch